



UNIVERSITÄTS-
BIBLIOTHEK
PADERBORN

**D. D. Emanuelis Gonzalez Tellez, In Inclyta Salmanticensi
Academia Collegii Majoris Conchensis Alumni, &
antiquioris vespertinæ Sacrorum Canonum Cathedræ
propriarii Interpretis; in Pinciano Sanctæ ...**

Additis Notis uberioribus ab Historia, & Chorographia

Complectens Librum Qvintum

González Téllez, Emanuel

Francofurti Ad Moenum, 1690

Caput XVIII. Idem Archiepiscopo a Bracar.

[urn:nbn:de:hbz:466:1-74544](https://nbn-resolving.org/urn:nbn:de:hbz:466:1-74544)

CAPUT XVIII.

Idem Archiepiscopo a Bracar.

Tanta est clavis Petri. *Et infra*: Ad confusionem P. Episcopi quondam b Colubrien. non potest in memoriam non venire, quantum in nos, & Ecclesiam Romanam deliquerit, despexerit Petri claves, & ecclesiasticam læserit potestatem, cum non solum interdicti sententiam (quam servaverat ab initio) temerè violavit, verum etiam induxit alios, immò compulsi non servare: & quos inducere monitis, & flectere minis, ac terroribus ad violandam interdicti sententiam nullà potuit ratione, post atroces injurias, amissionem bonorum, spoliationem parentum, dignitatibus, præbendis, & beneficiis spolians, coëgit miserabiliter exulare, ea suis in hac parte fautoribus non absque præsumptione temeraria conferendo. Quæ omnia idem Episcopus in nostra, & fratrum nostrorum præsentia publicè recognovit. Licet autem memoratus Episcopus in manibus nostris spontaneâ cesserit c voluntate, nolentes tamen, ut hi, qui hujusmodi sententiam interdicti non sunt veriti temeritate propria violare, ac recipere dignitates, præbendas, ac beneficia aliorum, qui absque culpa, & sine causa rationabili eis fuerant spoliati, severitatem effugiant canonicæ ultionis, ne facti perversitas transeat præsumptoribus in exemplum, auctoritate Dei omnipotentis omnem institutionem, destitutionem, collationem præbendarum, beneficiorum, ac dignitatum præsumptas per eundem Episcopum; & excommunicationis, seu interdicti sententias in quoscunq; hac occasione prolatas ab eo post interdicti violationem ejusdem, decernimus irritas, & inanes. Quia verò ubi magis exceditur, ibi est severius vindicandum, mandamus quatenus omnibus, quos prædictus Episcopus in supradicta beneficia, præbendas, & dignitates intrusit, non solum à beneficiis ipsis, præbendis, & dignitatibus, verum etiam ab aliis beneficiis (si qua obtinent) & Ecclesiis prorsus amotis, tam præsumptores eosdem, quam omnes alios, qui præfatum interdictum damnabiliter violaverunt, suspendas (auctoritate Ap.) ab officio, & a beneficio. Illos quoque, quos in personas, & res prædictorum canonicorum, Prælatorum, & clericorum manus temerarias constiterit extendisse, ad nostram venire compellas præsentiam, pro meritis sententiam recepturos, invocato ad hoc (si opus fuerit) auxilio brachii sæcularis.

NOTÆ.

a Bracharenfi.] Stephano videlicet Silvio, de quo, & de Metropoli Bracharenfi egi in cap. coram, de in integr. restit.

b Colubriensi.] De diocesi Colubriensi Lusitaniæ nonnulla adduxi in cap. cum causa, de...

c Voluntate.] Nam si celebravit violando interdictum, irregularitatem contraxit, juxta tradita in cap. postulasti, cap. 4. de cleric. excommunic.

d Officio, & beneficio.] violans enim interdictum locale, seu personale, variis pœnis puniatur. Primò suspenditur ab officio, & beneficio, ex præsentis textu; hanc tamen suspensionem non incurri ipso jure, sed prolata à judice sententiâ, rectè ex hoc textu probarunt Suarez de censur. disput. 34. sect. 4. num. 16. Gibalin. de censur. disquisit. 8. quest. 2. num. 3. Secundo caret privilegio, quod alioquin haberet, ut tumulari possit in loco non interdicto, cap. quod in te, de panit. & remiss. cap. is cui, de sent. excom. lib. 6. Deinde arceatur ab Ecclesiæ ingressu, donec satisfecerit ad arbitrium ejus, cujus interdictum violavit, vel ad arbitrium Episcopi, si interdictum à jure impositum sit, cap. Episcoporum, de privil. lib. 6. sive sit clericus re-

gularis, sive sæcularis. Deinde redditur ineligibilis, & impostulabilis ad dignitates, & beneficia ecclesiastica, cap. is cui, §. is verò, de sent. excom. & si de facto eligatur, electio nulla est, ut probant Suarez de censur. disput. 34. sect. 4. num. 15. Gibalin. ubi supra, num. 4 & spoliari potest beneficiis, si quæ habebat, & in monasterium pœnitentiæ peragenda causâ detruditur. Tandem qui violant interdictum circa ecclesiasticam sepulturam, excommunicantur, Clement. 1. de sepultur. & religiosi, qui non servant interdictum, quod Ecclesia Cathedralis, aut quæ in eo loco matrix est, observat, excommunicationem incurrunt ipso jure, ex Clement. 1. de sentent. excom. Gibalinus ubi supra, num. 7. qui rectè observat, suspensionem, quam incurrunt violantes interdictum, non extendi ad jurisdictionem; & ita sententias, quas protulit Episcopus Colubriensis, & irritare jussit Pontifex, non irritari, quia prolatae fuerunt ab Episcopo, qui interdictum violaverat; sed quia per summam injuriam prolatae erant contra eos, qui interdictum violare renuebant; & ita omnia gesta in hac parte ab Episcopo Colubriensi cessari præcipit Gregorius.